

四庫全書

集部

欽定四庫全書

儼山集卷九十三

明陸深撰

書

與倪小野正郎

比日陳子新過江東承惠手教副以諸佳作欣喜無量
具聞起居之詳復以為慰聞有小恙想遂勿藥闔宅自
老夫人而下均享福履每作南望豈勝向仰之至自念

山陰海上扁舟之約彼此同期歲年之間歎此未能往而彼亦未能來也奈何奈何深憂患之餘遂成衰老凡諸外物等付悠悠收斂此身置之泉石竹樹之間是中便自空洞絕無他慕惟有知舊時時往來于懷耳輒奉遠書竟不測是何境界也數日前夢小野科頭對奕作潦倒歌呼之狀如在長安旅邸便爾得報他亦每每還復偶然爾一笑一笑山居多暇得與兒子揖對案讀書或觀弄筆作字為樂想子新或能道之也

與何栢齋侍郎

伏計奉違之日倏忽十有七年矣自先人背養荼毒餘生無復有望於世無在羣疑積毀之中杜門待盡每一念舊愛醜顏負心者或至旬日未易以語人也特蒙記存賜之珠玉復以衰老為念此意尤未易以語他人也感激何如比蒙收召實出望外即日當北渡瞻望甚邇謹此具起居之敬儻不吝教言尤出望外也餘惟為道保愛以膺夫拜不宣

與劉子

介谿至舍下留兩宿奉所惠手書如獲瞻對聞起居住
勝奉侍為樂去歲作衡嶽之遊想遂竒觀也深是後一
月亦遂起告比抵京勉供舊職但憂患疾病之餘遂成
衰退大業遼遠終負斯志爾計審召命已臨不審為斯
道能一出否古之君子其於山林廊廟不必專有所主
若其志之所存雖甚不得已未嘗一日不欲見之行也
足下充養完密義理精深非淺薄所能佐贊若以足下

之惠得奉顏色敘契闊考德問業有所矜式則區區鄙私不能不眷眷也昨會劉憲副嘗與之細論計非筆墨所能盡也相望萬里未緣參承惟為道自愛

答張君玉

深比方卧病杜門忽承令郎枉顧強起以野服奉見於寓樓追念長者二十年之遊從知遇豈夢寐耶及拜手教累幅委曲誠款洞出肺肝具見長者風神精采真有福有德之人無任欣慰深辱愛最早最深今老矣不自

量力輕犯世故憂患頻仍心志衰耗賴先人之業足以
自適近築一隱居當三江之合流頗有竹樹泉石之勝
又累土作三山遇清霽景候可以望海其下葺退居之
室榜曰靜勝今年四十有九矣因命其左齋曰知非右
齋曰知還靜勝之後復作一堂度明年可成成即當題
曰知命但不敢爾醫藥稍暇時時燕處其中大懼以筆
硯為累即辨一味枯坐耳何由得奉長者一經其處隨
意點染悉成勝槩跂想如何是中藏書滿架所欠者白

齋集耳往歲在京嘗決券買一部念白齋當自寄到遂
輟又往往於友人家見白齋集輒復垂涎不意於今日
併與續集得之快事快事向晚到手自有滋味若此鄭
令君啓範嘗有場屋之雅間每一相見便問長者興化
事蹟啓範亦知向往者日赴召命去矣令郎不能久留
力疾附此以代起居之敬殊不盡所欲言者萬萬為道
保攝以躋上壽

與徐子謙郡伯

往歲卧病時極荷道誼之愛詞翰之教永以為榮永以
為感去秋起告近望節蓋在京潤之間竟以追攀不及
為恨還京碌碌無足為報舊病尚未得灑然每懷丘壑
之適此意渺然果能遂否即日郡政多暇起居萬福高
才夙學少試一郡敦本復古之政計已次第欽慰何言
望之來佐此邦想快人意也便中謹此修問餘惟保煉
以膺大擢

答方時舉少參

比日伏承遣使珍惠極感記錄奉展手教無任瞻企因
念契分如執事相望百里而二十年之間才一二會晤
人生竟如何耶即日具審尊候并闔宅萬福欣慰無量
但浙藩未赴此自新聞兩疏交陳殊為異事執事德望
才猷中外倚毗騏驥方發軔於康莊此豈回車時耶未
由面奉委曲為歟深今年四十九矣掃妾歸真力事猛
省豈特知非而已兼之衰病侵尋已成老醜春來一病
幾至委頓屬有婚嫁事了此便蕭然矣營小隱居在江

上頗有登臨稼圃之趣賤子自適恐非所宜聞於左右也力疾奉復容圖頌謝不宣

與陳玉疇侍御

深留南雍時最辱厚愛感不可言自顧庸懦歲月如馳而所以報執事者尚未有地不識執事之教繼今以往猶可以覲得否也恭惟執事以碩學宏才陶鑄畿內文風士氣一變近古顧以峻擢在邇士夫皆將為借寇之舉而廟堂之議亦欲暫淹以慰士望或曰執事將薄而

不為深未敢以為必然也伏惟為道自愛以膺大祉

答朱世光侍御

深獲侍教範極慰瞻依蒙賜款洽榮貴多矣別後審仙
舟尚留南浦無任欽企之至延佇為勞比承古經新刻
高辭妙翰若駢珠聯璧捆載而來把玩之餘真貧兒乍
富令人應接不暇慰浣之情如何可言是豈惟林壑之
光且將子孫世以為珍也不盡感謝深疎誕之蹤為世
鄙棄恭惟執事宏才正學清裁高風固宜激昂雲霄之

上而獨加禮於不肖拳拳若是非深所敢當也比日使車至止物情肅然勸懲所及殆出於指使之外此豈他人易以及哉一丘一壑藉之自安又深一人之私感也時下溽暑仰惟行臺嚴凜保愛為祝新涼當攜拙作請教高篇俟病間勉力追和深衰老頽情負知為惕臨紙不盡所欲言者

與楊夢羽

久不得夢羽消息殊以為念想德業進益大為三吳出

色也欣慰無量姚玉崖東還過貴邑幸清拂一二聞虞山之勝久矣有小山居可置否能結一草堂相待他日扁舟往來為打乖窩如何如何費當自任也但吾夢羽方將騰翬霄漢而鄙劣以此託之不幾於柄鑿耶遠當一笑餘惟為道自重

與夏桂洲閣老

深無似衰病僻居自公之還南也可聞而不可見今既在南矣又可望而不可親跼蹐寤想奈何為情適辰恭

甯台嚴斐相動定萬福高居賜第在丹山碧水之間感
念舊遊恍如再到初不知形骸之為累也此意未易以
言了惟公亮之比日徐御史宗魯還承示新刻試讀前
序目錄乃知文章家有人而公論自在所恨目力短蒞
未即卒業還復恍然茲表弟顧定芳南使道當出門下
敬此布忱深杜門待盡無足為道感知之私與日俱積
亦未易言盡也冬和萬冀宣節保重以迓寵召不宣

與嚴介溪閣老

深無似受知至久至深前歲東歸重辱垂愛抵家之日
惟有北望感戀無已跼伏田野間側聞大拜之命聖眷
無前亦惟有舉手加額為祝而已恭惟台候萬福功在
鼎彛顧聞問無階益深瞻企江東舊居向承駐節每登
小樓恍如公之在闌檻也此意非他人所能知真切真
切深入春即抱病已成衰朽茲遣小兒楫北來補歷少
為門戶計爾幸有以教之老妻久淹病卧宛轉牀蓐間
特念尊夫人不置可憐此意亦非他人所能知也亮之

亮之特命楫兒託東樓兄轉達之亮亮餘惟為國保攝
以慰中外重望不宣

答許松臯太宰

深無似誤辱知愛者踰三十年無任感激跼伏田野每
每念之側聞召命起自家山惟有北望為宗社稱慶無
階上記少敘鄙私方切感愧顧辱手教遠貽獎借太過
豈鄙薄之所敢當哉敬當珍藏以傳示子孫使知不見
外於大人君子永為世寶爾欽佩欽佩近田卷久淹歸

几茲因小兒楫北來補歷捧以請教幸原亮之餘惟為
國保攝以慰中外之望不宣

奉李蒲汀尚書

奉違門牆無階聞問跼伏田野惟有感戀表弟顧世安
還遠辱手教新詞捧以為寶頽惰之餘不知所以為報
也伏審台候萬福闔宅仙眷迪吉為慰霖雨之望日夕
跂踵此海內同情不但門生故吏之私已也深薄劣抵
家多病至今春尤劇小兒楫例當北來補歷因就秋試

少為門戶計爾顧此行父師之託端有望於門下念此
子頗淳謹曾辱青目想蒙與進此骨肉之感也伏惟留
神萬萬

與孫穀齋宗伯

自前歲東歸極蒙欵愛抵家多病不獲以時起居徒有
瞻望顧辱手教遠頒捧以為感伏審向來台候萬福聖
眷優崇霖雨之望日夕跂踵恭聞顯陵之行備承濃賞
即日有留用之命皆大拜之兆也黃扉伊邇鄉邦有光

其在鄙人尤以為慰深春來瘼火大作醫藥無效俟命而已小兒楫勉令北來將就秋試蓋為門戶計耳念此子孱弱又未立嗣依歸有人所賴執事耳幸有以教之骨肉之感至叩至禱

與張陽峯宗伯

深不肖跼伏田野無階聞問忽辱記存特枉教翰副以陵祀諸作春容雅健真太平宰相之言也每以誇示鄉里襲傳子孫為寶繼聞內召聖眷優崇又當代之所希

有也喜慰之餘特深向往茲辰伏審入朝視篆大宗伯
矣金甌之覆計在旦日此亦海內之同以為望者也匪
佞匪佞小兒楫向辱顧愛茲來補歷敬令起居以近德
容尚祈終教之想蒙不外多病臨書不盡所言

與金美之太史

舊歲寓京邸姚生一貫來承手書名畫為惠甚渥屬時
南歸匆匆遂阻裁謝抵家碌碌多病多事益取疎外比
日姜明叔過舍具審起居佳勝德望遠孚但傳有枉顧

之信殆成虛耳如何如何昨少湖來相對兩日夕每道
高雅不置當時買山收租之語今日兩禿翁政可辨之
此豈亦畫餅耶表弟顧世安奉使道西湖之上恨不能
附青雲也聊布所懷目力日短殊不盡所欲言

答羅整翁太宰

深薄佑早衰卧病海濱者已再閱歲矣忽辱手書佳惠
感極而繼之以泣也豈勝欽向恭審台嚴祺相萬福自
違道範以來四易寒暑屈指明後年計登八旬念欲捧

觴道路匪遙而人事難必徒深瞻望伏惟安車蒲輪之
禮國典固存而天下之望所繫尤重萬惟為道保愛為
祝深手足俱廢託門生代筆以達無任皇悚之至

儼山集卷九十三

欽定四庫全書

儼山集卷九十四

明 陸深 撰

書

與楊東濱十五首

唐橋夜別情感萬端抵家不至勞倦否深南來一行人
皆賴尊庇粗適輕舟軟輿上下山水間如在畫圖不知
身是遷客也入閩尤勝大都丹崖碧潭隨處而有至於

橫嶂絕壁倚天卓立白雲英英卷舒其下剗削點綴疑
有神工鬼斧不可名狀每每忘返悔恨不強東濱來共
此為之悵然八月廿一日履任正當木犀盛開山中老
樹有兩人合抱繁陰蔽天清香數十里愧無少酒量酬
之公廨在山椒四圍紫翠在一指顧間後有小園有方
亭流泉時時燕坐耳目清淨可以忘老於此矣知之知
之辰下文候何似諸郎進學為慰世相日在念奈何無
以振之也致意見怡直吳千兵為謝之不悉

昨風作潮漲江門如海甚得奇觀浮薪無數恐非盛幹
輩能拚命採掇也致去七十束應爨下繼此便可令人
持具來也草草

辱厚情拳拳即病祟退聽矣感感容謝道理天地間甚
大仕宦沒溺人最深此古人見成話頭煩東濱為我大
書榜之座右草草附瀆勿罪

晚將有佳月別具畫船載鼓吹同汎何如拱候適得和
章辭翰雙絕令人爽然繼之以感歎也內典謂世界本

闕陷奈何奈何昨載至湖石數株西堂前添却一倍磊
砢新涼得月能過我為信宿留乎兼製隱居冠服待旦
夕間命下便作山中無事老人矣餘面盡不宣

山居初就日有遊人每一躋攀東濱未嘗不在念也邇
日道體何似靜養為樂僕新置二畫舸只用四五人可
行約載數客其一設繩牀偃卧其一具歌吹先驅風日
妍美即挾以出浦隨潮上下選勝而登或尋小港汊訪
故舊即牽挽而去雖滑泥亦可動此或古人所未有也

今秋稍健顧念京師同輩多入鬼錄不能不為之嬰情
耳娛老之計聊報知己他人固未易言也亮亮

夜來滕東遺過宿山館因作數大字遂至腕痛老態衰
情不獲款洽今早去謁想遂佳晤儻能同渡為數日之
留得傾倒也如何如何家嫂病勢可醫但舍姪輩心力
不稱人意重可傷也十月天氣如春田野間極有好意
味不勝跂望幸情照不次

北發不及一握手正是惡滋味也清明時節樓船簫鼓

行江南道中亦復奇勝三月三日渡江過儀真從陸抵
環滁雨中望醉翁亭甚適自此渡淮洄溯黃河登太行
陟上黨涉沁橫汾入晉陽即日將出鴈門入雲中歷覽
長城之塞帥諸生較射慨然有北向燕然之志每當意
會處未嘗不念東濱同之比來起居何似幸自愛

深到此粗遣出巡將及千里往返山川有極佳者大率
太行西麓為山西萬山中得一平曠有水處便立州縣
城堞外四面皆山真所謂萬疊雲屏也五臺尤靈怪而

長松喬木高下森矗如虬龍肩輿只行樹梢也六月須挾纊都無暑氣尚欲抵雲中觀漢武五將軍出塞之地上醫巫閭然後南還耳匆匆報此

僕夜歸宿山中晨起觀初日散影遙田滿地皆白雲以軟輿經過瀰漫霖霖俯見城郭此身真在天上須臾扁舟亂流如汎瀛洲還坐南榮映日從兒子寫漢書一兩段方啜新稻飯一盃此樂恨不與東濱共之急足報去能乘興來此一話如何

連得手教皆極感慰兼省風神潇洒間適為樂深謀歸
未能賴有山水之適以自遣耳匏繫羝觸私心奈何兒
子楫每蒙教愛此兒稟氣薄弱但習為淳謹是非之心
不爽爾豈可便使之涉世況苦於多病文學未必能工
應舉甚非吾願亟自江西令人止之已無及矣懊惱懊
惱如深科第非不高年歲非不早今白首奔波討實受
用處難得欲示戒於此兒也煩東濱以靜定涵養誨之
世間浮華事恐渠未有的見耳至懇至懇試錄一冊漫

往令郎賢親一讀此中有意義不可以尋常程文視之
餘保煉為祝

比因修葺發地得一石刻甚奇偉細觀當是黃書蘇文
考其文義為畫竹設當為墨君堂賦但今蘇集無之恨
寡陋無從審定也惜脫去前後想不知石總幾段此特
其中一段耳驚歎之餘臨去一紙請博雅者為一校勘
有興即請過同視之如何如何

別後戀戀為懷適華札佳味遠致甚慰甚慰渡江無苦

令人幽然吾人曾次要陶寫精神要發舒然後陰魔退
聽也須常提掇如此却是曾點輩樂地也知照呵凍作
字覺老態不罪不罪

深居南中多暇喜為人作草書彼處士大夫皆贊歎恨
不多得以深北歸之速深亦覺運臂落墨殊勝少壯時
嘗與汪間齋侍郎論此惟惡惡筆惡紙恐是老衰退步
處可怪也今早發至紙不佳內還寫去兩幅煩為評之
若毀譽失實便當與東濱絕筆矣

昨張勵齋行次附啓殊不盡情茲相姪南還念欲傳情
言更難盡瞻望之餘奈何為懷即辰想道候佳勝日有
真樂深老矣愁緒無端覺人間世太局促也江雲海月
之思何嘗不在夢寐千萬珍重以需復會相姪此來甚
不副所圖一則機會難乘一則力量未拓姑令養晦以
俟幸有以教之一時朋游凋謝吾東濱魯靈光也西巖
令弟為致區區不既

昨以田家事催我東渡西郊汎月伺重陽修故事也花

間與客坐水晶亭子得佳章累幅不覺滿座生香此又一境界也晚桂將舒早菊欲放芙蓉映條柳在秋水薰葭之外何當置東濱於其間讀道書也

與曹茂勲四首

深自十五六遂蒙過許定交當時但謂深能為時文可以取科第深亦以此自進於執事未有如古人之交者也然執事天資峻絕意氣麗澤其去今人遠矣深生長蒿蓬之巷少無淵源之澤俛俛流浪未始知有古人之

道天不罰棄俾得從士君子後奔走苦辛之餘少有所
得思欲致之執事以報知己昨走拜奉執事微言察執
事殊無相信之意當日議論亦但及文藝而已他蓋未
暇吐露也執事自謂力不及為是誠不可古之人其所
得為皆為之所不得為者皆天也孔子有曰朝聞道夕
死可矣若預料得為與不得為以為進止竊恐學問之
道不如是之暴且棄也東還聞吾父兄子弟動輒稱尊
字蓋有微視舉動以為法式者則執事不可謂不繫吾

海邑之風化也得自輕乎哉三代以來朋友道喪諛悅
逢迎最可悲痛使深而無知則已深既有知不忍為也
學制一篇奉上覽正塊菴記一首并寫去僕之志聊於
是見一二矣昨偶遺茄柸因以馳附鄙意香糕少許恐
執事讀深之文倦而思睡畧啜以助終篇不勝慰幸

令伯至辱手教兼悉居起甚善為慰索令祖母孺人墓
誌已為撰成顧卑陋之筆不足發揚先德是懼是愧行
狀中有數處未安悉加潤色作誌乞知之殂字是不得

正終之稱況是君后所用綱目凡例可考見也故僕只書卒繼聘二字義是再娶也祖堂恐不當稱之詳讀此節文字委曲反覆却是執事欲與祖堂諱其為妾古人妻齊妾接乃是定分名正而言順此正不當為之諱耳故僕起誌側室二字為綱却用繼嗣一段接之自見其為不輕矣多材藝至通曉一段此雖是祖堂實事然婦人之職無非無儀欲以是為盛德傳之後世恐不可况多材多藝四字尤不可施於閨門故僕却敘此事於誌

尾以見其為令祖堂之餘事而亦能如此精絕不滋重
與中敘祖堂起家一段尤未安細讀文義却是當時曹
氏凡百大小皆出自祖堂不復知有嫡矣古人嫡庶之
分恐不如是其為祖堂累甚為不淺故僕盡用執事之
文而小變法度見其若有承統而祖堂之功在曹氏者
益顯嗚呼金石文字有天下萬世在後敢不慎重僕文
雖下劣然却是字字較量過也更有未安處乞以書來
僕尚當改定不敢憚勞也若入石須得善書者為佳或

即託楊伯立作楷亦妙刻成須搨數本見寄僕官銜本不欲書但前輩皆如此姑以備一代之體也不識如何屈指禮闈不遠冀得傾倒耳僕日與人事相俯仰舊學愈就荒落殊非初志迺知山林之日長學問之深之語為古人實見一涉仕路安敢望其長進耶伯立向不得消息聞之來人頗不似初喪時守禮可惜也匆匆不及附書幸諭鄙意近日科場文字只宜平正順熟不必過於出奇此在令郎輩尤所當知績之乃郎試復居優可

喜可喜惟恨諸故舊俱落落然不相及此何理也幸道達千萬秋涼孝履萬福

去冬曾奉一書兩歲間不得執事片剗孰謂親知契舊如茂勲者而乃爾耶惶悚惶悚家兄至審知動靜萬福為慰深今歲荐更憂戚每思東還之樂竟不可得往時看海月宿百菊亭扁舟短服出沒浦雲荻花間與知己者奕棋飲酒比一思之恍如隔世何時能復有此事否雲溪亦無消息何故人皆棄我甚耶漫一問之當有報

我者

自入春以來深未嘗通問於執事執事不以深為罪深亦未嘗蒙執事片劄知執事非忘情於僕也自謂當膺首薦而來會合有期矣日夜懸望此意竟虛僕始悔前日之不通問為畧而又以不得執事片劄無所於慰也此情當何如耶人言學成而不遇知己者則不偶夫以執事之學而得士庶為主司竟爾不偶何耶將所謂聲譽不彰是不肖者之責耶意者其有司之不幸乎或天

意竟將晚成也自愛幸甚葉廷用至聞三郎有疾今當
何如大郎學業已當大就其餘諸郎想皆彬彬如此執
事亦足以自慰矣深旅食京師常忽忽不樂有難以相
告者月初蒙恩待罪史官祇懷慚爾奈何奈何家人東
行聊此奉啓績之伯立皆不及奉書會間儻出此紙足
矣時下嚴寒保嗇自愛

與李百朋二首

勵齋來得手教審起居多福賢郎向學極慰遠懷古人

有言富貴春花雨後紅耳人生行誼感應如響造物之
巧誰則逃之後來善惡之師也吾百朋聰明學識俱過
人目下似淹滯又安知天不報之以久大耶居安身健
課子明農復有文酒為樂此自神仙境界珍重珍重深
老矣十年去國萬里一身此蒙聖恩垂念拔擢清華玉
堂重上真如夢寐過望過望過分過分便中聊此附言
餘惟為道加飧以需蓴鱸之盟不具

山居新作榭在玉華之顛昨乘月登之殊有異景因念

吾白山無由縮地也奈何奈何雨後新涼得暇幸枉過
一敘懸企

與姚時望二首

別來不審貴恙何似所託想一一用情深無復南顧矣
提學到吾家子姪輩恐作一番畫餅耳如何如何令郎
當在高選却有費用辦否楫兒只令讀書與靜坐夙興
夜寐便是功夫瞿生稍稍誨諭至叩至叩寫得途中雜
詩一卷付楫見之知我近況也所喜舊病盡失頗耐勞

苦復恐是秋後熱匆匆不多及

小僕來得所寄書甚慰甚慰令郎已入學雖是小試三代書香亦邑中盛事恨不能為助也舊恙秋來都好小兒得拘束誨益大矣想能體悉鄙懷楫將冠煩時望字之乞一說為教如何僕意楫以操舟必先舟作乃繫安危欲以思豫與豫舟字之必得發揮乃可令郎能來與小兒講學已命楫禮之僕當圖報也

與姚子明二首

伏暑過廬嶽得報小試獲雋為之喜慰為我時望亡友
含笑而揮涕也但不能奉餞耳薄儀別具鑒之楫兒學
未成遂蒙當道與進誠所謂附青雲也何幸何幸已命
相侍世契之雅想敦念之洗耳聽捷音容致賀極草草
石屏承佳篇感謝感謝但作長篇須要轉摺變化轉摺
在換韻變化在押韻若押韻不穩貼便成薄弱昨明卿
歌頗得意可同此言參之

與姚玉厓

別後自春徂夏皆在病鄉一味畏濕耳今歲雨多生寒
故比之前兩年覺重望七老人不特受制時候而已玉
屋向來何如近日已買得佗山之昭慶有茂林修竹佛
屋拆盡別作小亭館以為娛老之計當有蕭然之趣不
知玉屋肯來同住否世安弟病目杜門已兩月餘秋已
新不可無一訪也楫兒就臺試必相見專此起居邑中
小考如沈生希臯亦不與此外舊科舉共有廿一二人
遺材亦是說異事大率小率皆難憑據付之一笑餘惟


保晉以躋上壽不具六月十九日

與馮會東二首

昨夜風雪中遂宿浦缺口幸無他可勝瞻望承示和章
甚佳適得東坡韻咏雪兩篇是令郎雅製持誦欣羨為
雪竹喜賀不已異時當奉識也謝謝張遜之山石肯惠
然要須禮求之牡丹恐俟來年秋分可移亦宜愛護以
待呵凍草率亮亮

深春來抱病久卧郊居人間事都謝却載石已命兒輩

處之來意多感力疾草草不具



儼山集卷九十四

欽定四庫全書

集部

儼山集卷九十五
七

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷九十五

明 陸深 撰

書

奉梅月伯父

陸濱到奉教言深感至愛備審壽體康強細觀字畫皆
無異少壯足以占壽年綿遠不勝為慰所示弟姪入學
門戶之光皆嚴訓所及但須努力向前以期遠大姪之

所望於後人者此心更自切也老父仰望伯父大人時
賜勸譬得以頤養老境修墳造房等事一切當付與深
也如尚有過當處乞念深含容之深自入冬來舊病漸
除但新差司禮監教書雖則五日一往內臣有三百餘
人俱從教授兼出入步行十餘里極為辛苦職業不敢
憚也京中事體聖駕雖回在宣府祖宗法度具在人心
安然如故况關係甚大乞不勞過疑也家小春間須作
來計遲速之間伏望主張行裝粗能備辦也家人如教

禁治家小起身以後浦東大小事宜俱望教戒時世如此安危未保不可自受累也餘惟順時保重以享上壽

奉東隱叔父

溥弟到京具審壽體納福并諸動靜不勝欣慰家小及兒女在路安寧四月廿二日自河西務起車抵暮入城雖受辛苦幸無險阻皆賴叔父餘庇也姪居此守官粗遣但監事煩冗早莫奔馳無時下不測每懷憂懼爾家小既來於姪雖便老親左右無得力人仰望叔父時加

撫問不至寂寞也今年科場兩弟考試未知何如當此之日家門已大須防小人侵陵惟有子弟勉勵讀書可以支撐今各房中惟有此一路可行叔父教子之心甚切故敢及之餘惟順時保重為祝

與唐龍江三首

近趙國賢還曾具啓達伏審邇辰台候萬福壽堂暨賢妹甥輩均安為慰深衰病日深思歸殊苦比兼攝湖東奉咨裂紙將過信州差人云欲開局修八朝國史不知

會典結局未令郎聞已授官矣未有的報幸示知江西
科場吉安最盛有時名者皆不在榜昨觀南畿錄吾郡
之否亦開科來所無豈文體將一變耶江錄漫往不知
舊生徒有幾草草附瀆餘惟若時保愛不盡所欲言者
深寓蜀二載如在世外東望故鄉聞問為難兩辱手教
無任感慰比蒙恩出峽抵荊州取道北上復過安陸謁
陵徘徊山水之間念皆執事過化之地也為之慨然如
挹顏範方今天子思求耆舊而用之恐隆中未得高卧

少須勸起以慰蒼生之望深此行速為入謝將圖自便
然善後補過之方幸有以見教也至叩至叩兒女輩在
家過辱骨肉之愛非謝可盡行次草草不謹直齋芋西
公會間為道瞻企之私餘若時保攝為禱

疊辱教惠極感記存具審道候萬福為世師表足慰瞻
依邇聞海寇擾攘寒族高門唇齒相依倚執事為幷幪
也况老荊弱孫尤在咫尺幸垂清拂今日始知城池之
有用也留意留意兩甥失解南還及壽筵骨肉團圓人

間至樂揖兒多病且留過寒他不足道也深衰病侵尋
憂疑滿腹臨紙無任惘然世全甥蒙時存候異鄉骨肉
賴此與世安耳恐要知餘惟若時珍重

與表弟顧世安十六首

令祖詩云當門五株柳負郭二頃田此東歸景物如此
余既無田雖柳亦不可得近營別業以待東歸姑欲插
柳須乞五株種之乃可冬月將盡幸能惠我否久別欲
一話風日和暖時望過一宿至叩

本乾但知其善醫未知其好道也非昨見示幾為失之
此人博聞多藝夜來與陳生同榻往來辨論僕隱几聽
之自足為樂吾未暇究竟其淺深何如但其器根不凡
妙具圓融豈所謂湖海之達生者耶賢弟留作伴數日
未必無益齋持玩物吾第一見之足矣恐別有主者明
日止為郁直齋李南園二公天氣佳甚一來如何

深啓得夏間書甚慰昨見朝立乃郎云有書尚未送至
今早唐士同憲副家人到及見孫廷圭問及煩道有一

二不如意事令人馳念不能已處今之世務須安靜含
忍為上吾弟素有見處自能中節如劣兄者不待五十
而知四十九年之非矣舊病侵尋時事多棘老幼在念
奈何為懷敝廬薄田已足讀書待老頗悔此出之謬也
豈世緣尚未了耶身外事自可付之悠悠矣姑娘而下
想均納福粟例再開恐令弟亦須乘此會耳孫壻小試
優等不負美才聞之喜慰向朝立在京時曾有言欲求
自便計今尚在否從厚處之須令子母間各遂孝愛之

心與區區養又過一等也如何如何浦東兒女輩想
蒙顧愛非言謝可盡風塵渺然未緣骨肉之聚臨紙悵
然

兩日有遠客兼先隴事殷奔走不給奈何目下想已康
復不復致問承示病源正僕數年前舊犯須早圖之若
所謂積熱恐無之蓋是肥甘釀成垢膩滯在脾間下虛
上壅為痰脾土受痰遂作沮如濕蒸而熱耳非壯熱也
醫家用苦涼之藥最有近效浸成後患尤宜詳審積滯

感時氣必作痢宜用白芍藥澤瀉等劑分理之不可驟服止藥今後須食淡省思為要訣此二件乃脾家內外扶持之妙藥也園中晚菰菜肥白連根一截用甜水煮成清湯極有自然滋味侵晨空心啜碗許最宜養脾利膈白芥子時嚼數顆亦好

屢承骨肉之愛非謝可盡比日世芳蓋臣二生入監又辱厚惠所諭領悉久客天涯見此骨肉令人喜極而繼之以泣也百凡不勞挂念近又得沈方伯家人寄到書

知老父移居北宅心背俱刺四弟失教以孝弟之道致此狼狽亦深之不孝不德為之南望惟有痛哭而已委曲情事亦惟有賢弟知之族中兄弟俱多離心而嫡血子孫盡不可恃賢弟早晚幸為調護深生死不敢忘也若有緩急之用可分付陸傑顧慶二人處之若再有重大事賢弟權為處置亦生死不能負也桂魁奴狗狂蕩如此深用人欠當豈亦窮秀才命中招注須發遣到京終當重治緣無的當人始終其事須深來春自還可也

幸密之密之新府尊行時已嘗致囑去知之

深拜啓昨相姪還病目寄數字為信比家僮至頗訝賢
弟無書想即辰文候納福官事竟如何也聞九臯大諫
來署縣事吾邑之福欣慰無量近知治吾家作過諸奴
老懷遠客為之快暢已作書與子壻輩致感謝之私而
已深方慚慙未敢頌言謝之儻謁候便先為深致此情
至叩至叩

楫兒欲出就試深慮其體弱幸教以持心養氣之道不

知賢郎諸姪亦有出試否後生輩但不可留意得失以長浮競之氣為佳爾崇明之變近如何當道諸公必有撫禦之術便中幸示知餘不盡所言者

深冒暑出巡江湖之上得書如擁冰雪慰不可言楫兒承教愛幸與觀場之末深甚慮其涉世之太早也賢弟近聞出上金陵能攜楫兒為旬月之行深大願而非所必也如何如何遣急足去揮汗數字到省別令家人還修問也極草草

比還朝人事倥傯殊非老境所堪也奈何奈何會馮汝
學說賢弟事甚悉為之驚悸世道如此且安心耐之釋
氏以忍辱為修行第一義賢弟自能容受之不必芥蒂
可也甬川少宰特蒙留情知之知之秋間望賢弟入京
古人云金門大隱豈浪語耶燈下草草附此殊不盡
世具甥來縷縷道起居之詳令人遠想慨然走自夏初
入都門衰病之餘殊覺人事委積隨分應酬倦即撥置
世間榮辱毀譽事一毫不復動念但靜中別起一段思

慮難遣即釋氏之所謂魔也當持定力勝之賢弟能北來可共辦此功業如何如何

蒙恩內轉實出望外兼聞詔旨曠蕩雖三代恩典或可得也故遂乘此春和入朝自荆襄北去勞動亦不敢辭也老境奔波乃爾唯賢弟亮之家事乞與楫兒一處楫欲棄遠田甚好甚好吾當成此子之志但須賢弟酌處不使有後累為佳住大江濱東裝燃燈作書殊匆匆賢弟能人意會否賢弟有意北來秋涼能遂相見乎深北

去盤費人力俱欠亦望與楫兒議處不令荒廢學業至叩至叩

老入劇局舉目萬里雖片紙數字猶難得寄雖寄亦未知得達否況他乎亮亮聞賢弟亦時有啾唧此恐是少年作用大過或時事不如人意動火耳吾此來每有所悟亦有一二高人如何栢齋先生相質問目今通宵宴坐青燈熒然頗有趣味但時有歸心作魔耳留與吾賢弟盡之第未知世緣何如也還復慨然度人經此間有

印本寄一部去西樵別當覓便補之闔宅寶眷想皆安
世道日下得省一事且省一事餘付之老天而已匆匆
不盡所欲言

深昨別後入舟作小憩風水俱令人疑懼還入寺中避
暑見郁宗周來云見小興道中知賢弟已入京受累極
懷感愧也夜來小女病作比常稍增鬱熱故應爾懷抱
轉無賴奈何舟人似催發南去三四公都到行止未定
深意欲俟一雨後解維前途任運而已此間無人商量

周一之望速之來同載也如張希周差事何時可辭朝
抑恐不能待煩一問之六弟汝由姪感渠意甚好世全
甥致謝不悉

見南載有發者歸心如飛欲隨意去耳入京人望促之
幹辦來不知周一之何日下灣也跂足而待附此見意
舊恙比之去歲稍減重裘絮帽枯坐一齋者六七日老
態時當如此爾忽聞有人入都力疾附此紙宅上俱安
諸郎皆玉立森森從德尤解事明敏夙成昨入學為提

學所稱許亦復作微語為教戒知之知之榮擢乏便修
賀茲致少物去引遠誠鑒入故鄉風俗日下亦欲攬回
顧忠信素薄奈何奈何得吾弟在朝老僕居鄉亦自遣
慰桂翁處每欲作書輒止以傳聞無真的信見間為致
傾向之私不盡餘自愛

灣下執別無限情感十七日午刻始抵河西風水淹延
皆竭晝夜之力前途任運而已去國之人不當作朝貴
書亦自老懶遂放舟去見桂翁為道此舟中眠食頗勝

惟此而已亮亮

與黃竹泉三首

令弟瑩卿至多承遠惠書物言謝不盡即辰伏想尊姐
甥輩俱安好也深自長兒亡後憂苦萬狀鬚鬢盡白兼
有老親之念忽忽如在囚繫中恨不一日東歸得見親
戚骨肉為樂也奈何奈何令弟淵卿書來說河弟李廷
益房基事深並不知其情但河之嗜利忘義乃其積習
必有不當人意處吾姊丈當教而改之可也至叩至叩

今日適有丁祭事忙因蔡歲行便草草附此雖七叔宗
潤兄處皆不及作書詩卷容別寄上也餘惟情照萬萬
承以胎仙一雙為貺與病骨爭癯甚慰岑寂但飲啄無
豐腆恐戀故主乘長風而東耳珍謝珍謝

屢承厚愛不勝哀感竹泉卷納還頗恨諸作未足以發
揮高雅耳姑俟情事少伸當別圖之令弟淵卿與河弟
房產事想有善處之道幸早斷之恐惹別議也特人奉
請更瀆黃甲近當肥美茲欲遠餽煩為覓數螯佳者恃

愛干瀆不次

與黃甥良器二首

扁為書去四字易後二字以寓孝思易前一字以避俗
紙用礬重甚不宜筆只寫去一幅亦不佳可求佳紙至
當寫去聞新樓成東望在目余老矣何時一登以望大
海為快也昨承園果乳酥之惠感感俗事擾擾無一刻
閒暇病餘無可驅遣稍覺淹遲勿訝甃堦卵石儻有剩
便中為致一二斛許不一不一

近日人來得畫卷多謝裝束之勞手東亦作一卷極見
賢甥致意世誼令人感慰為寫跋語去藏之載來石題
一檀扇為謝大抵湖石須以無斧鑿者為甲老奴欠眼
孔非賢甥初意也絹畫一幅寫舊作其上樓頭秋色可
懸懸如見老夫也今春發痰火殊惡昨日始甦過山居
打坐須盡此月方接人事賢甥有暇可以扁舟來覓我
水石間也四軸已寫畢袒奴負不起俟別致之餘不盡
欲言者

與黃甥良式十二首

比聞舉得男喜慰不可言是日報至予坐南樓適傳秋
闈消息欲以應科名之如何連日匆匆未及作答知之
薄具少物充粥米幸收之餘留面悉

別來三年行數萬里棧道劍閣瞿塘巫峽水陸極天下
之至險而寔亦天下之至奇此生遊覽之興可謂饜飫
而予已老矣連年三月三日每有事今年以是日渡漢
江由襄樊而北四月初入朝遂履任隨分供職昨以孟

秋時裕始與聖主相授受蓋八年釣天如夢寐也承遣人遠來欣慰無量得安南議見學識長進且有志也此等事自有一副當人才當之予素不與聞其事此中非紙墨可了北來且自見之知之入監已成就如此亦好第愧無以助之當以逆旅主人為任也楫兒想蒙教愛秋試聽之老天而已餘惟自愛

賢聞病何如恐是血虛畏燥耳與汝姪所患頗相類否却好尋醫血惡寒而生於寒行於熱而畏熱要知之唐

詩絕句付來一閱明早望日須赴監當守法如是不具
知吾甥已入潞河得遂親桑梓亦是一樂吾欲更賦一
詩為別祇成一句云老懷旅思更逢秋後不復能續意
可想見得書感拳拳一之同此致意張宗之吾甥即道
吾意致書無不可者餘不盡

昨嚴照來得書具悉蔡老朴魯不甚知事本再上明日
當發抄工部西磐尚書面許為行却並乞築城事若一
舉兩得亦吾鄉邑中百世之利也昨家人至又得與小

兒書讀之得失固自有命爾且留了監事令渠從實地
做工夫賢甥歷事已辦但未知何日得見甥面也懸懸
聞汝老姪東來小莊不免有擾謝謝所論沙寇本吾民
有司失於撫馭遂至如此又不能無師老費財之慮事
當如何茲遣學召回欲移家北來百凡望周詳慎密處
之至望至望至託至託杭嘉避地之策與松城卜居如
何亦希酌量歲暮候報信也續絃成亦足喜餘不盡
近得書知有杭州避地之舉不審海上事情竟如何耶

令人睡卧不安不圖老景遭逢乃有此付之浩歎聽之
老天耳京師事勢又未易以一言了也奈何奈何又聞
河決鳳陽兩洪俱竭若春水可乘且攜家北來儻更有
阻則卜居松城差為穩便耳賢甥必能為我謀之草草
附此日下當別有的確信息也留意留意

日來屢承惠海鮮池魚甚慰病起但脾胃尚未開健差
勝前日骨立耳知之知之刻書復成幾種可草草印來
一閱病餘因清出雜記畧有數卷寫得十葉付去就煩

一校勘若雷同剿說抹去可也予此等文字大意欲窮
經致用與小說家不同幸著眼可命照入刻行款寫一
本來有商量處也雪天殊無好況晴霽西來一敘懸望
懸望臂痛不減不多及

比復患鯨魚感感連日病勢覺退但脾胃未開耳求醫
了無影響可怪可恨吾甥作事必精所刻書不下古人
計費亦不貲也篇名嫌不響可題作說海如何有緊要
與典禮書多入幾種為佳臂痛轉劇指不多及日下望

西出閒否亮亮

小說若刊須喚得吳中匠手方可發還九種檢入但訛
謬極多要校勘得精却不枉工價也予家所有俟天晴
清出農書塵史兩冊頗便病目留一看

老懷為病困殊無賴昨許三府過訪慨然有築城之議
但其言太易耳說漳州賊圍定海致書寧波守稱老兄
索糧一萬三千其無忌憚若此時事可慮也又云漳州
賊每往蘇城市易崇明交通更不可測沿海一帶尤可

慮也近便處有得力人能覘候動靜否煩一用心為之
不宜露消息也至囑至囑候報臂痛楚作字艱難不多
及

二文皆宜抄錄夜來樓居風雨不成寐却恐今年無麥
也奈何奈何痘疹書校勘得可寫便寫入刻早完亦一
件事了留意天晴過此

痘疹論已入刻未吾甥所作後序亦佳老懷殊為喜慰
劉栢山北行在近可促匠手早完欲送與一部以答其

意耳嵇中散集及塵史俱便病目連日雨中藉此消遣
尚未畢也松籌堂集聞是此老手編果精當否可細讀
三四過西來商議其中若有關係朝廷典故及可備郡
乘闕遺者另錄以藏此看書要法也志之志之夜來病
思甚不佳奈何奈何稍晴望即來夜話伺伺

儼山集卷九十五

欽定四庫全書

儼山集卷九十六

明 陸深 撰

書

山西家書二首

從遼州出巡回省得汝書文理雖通未見長進處可用
心讀書作文如今秀才難做况朝廷行揀選之例甚嚴
山西處所有退百來名者進學亦甚難此中却有好秀

才十五六歲三場文字可觀者到處有之亦有是上年
科舉者吾兒自宜勉勵知汝母子俱好心甚喜慰但知
汝有腰痛疾少年豈宜有此莫是跌撲來吾甚憂懸姚
時望病近當瘥復吾愛此人恬靜欲養汝德性故留之
吾每思難得一箇好人為汝師範若姚昭唐鑑此二生
汝可延請至園中作會看書考文朋友之助亦自有益
切不可放心使性為游戲無益之事且過今殘年明春
我南歸教汝兒須以遠大自期家事一毫與汝無與最

要孝弟和敬處宗族早晚奉事母親如今不小矣只此至囑

此處亦有好秀才不減吾江南但十三四能作三場文字俱通走科場者又江南之所少也得便寄數卷回汝苦用心可也餘不能盡筆

浙江家書一首

我廿六日已到任今打發陸鑑先回報知一路事俱可問鑑山立俟開年遣回崔來鳳先生是添註官甚閒吾

兒可收拾來此講學汝母親須待二三月看此間光景
座船來請也汝來須是正月半前叫箇閤頭船坐來勿
使人知至囑至囑

江西家書十一首

我離家已兩月餘汝用功何如古人言寬着限期緊着
課程緣汝氣體弱又有舊病須要節量讀書學問大事
在養心養心先須養氣元氣充足百事可辦汝性靜定
有可進之資不可虛負了家中閒雜不必管接見人務

要揀擇無益之事足以費日力害身心當畏之如蛇蝎可也抄回文字一冊是察院試卷熊鼎臣李六峯極稱之方恩是一都司乃肯向學如此

近日相姪自武當還與劉甥人奇來俱會于司中備知吾兒在家學業不廢并見汝書字皆慰客懷但聞崇明有警愁汝母子驚惶今日李提學來自蘇云已定疊甚喜甚喜此事自有天數也汝欲隨例出試亦好只慮汝乍涉人事出入官府勞苦不堪耳只要小心敬謹若作

文寫字必須整齊有法度與朋輩交接謙和簡默自重
為上自餘家務俱不煩汝也寄回聖政記一部十二本
此即太祖實錄要熟看中間頗有誤字錯簡闕疑可也
象筆四管收用

我出巡在九江六月五日得家書始知汝考試的信但
列名在四等得與觀場亦是當道獎進之意汝宜自立
以無負知己也若往南京只與姚子明同船甚好館穀
薪水費當一力助之其餘量力各為幫助亦是汝報其

師之意也須往丹陽上陸路顧一女轎多備一二夫力
擡之行李盤用江行載入城顧一闊頭船甚為方便不
可於此等處惜費入城須借一僻靜下處可請問顧五
叔必得佳所至囑至囑落下處後宜杜門靜養令精神
強足則文采自彰無益之事料汝決不肯為但人事奔
走與往來交際禮不可闕者亦思撙節之至囑至囑

最宜擇交若浮華輕薄之士致敬而遠之不知三試錄
曾取下樓看併有辛酉同年序齒錄否只在叢書中不

曾清理付汝若得入手看之但是我同年或同年之子
孫俱要致敬盡情以敘世講之誼至囑此等事須場屋
畢日方可行之未入場之先且須與子明或陳子充與
唐門親戚舊科舉吾鄉老成質朴者去投卷看班圖先
了公事雖出口行路亦須遜避謙恭若見達官長者尤
宜寡默恂恂汝早有令名古人以為不幸須防造物忌
之至囑至囑其餘事宜汝當隨事省察存心為上酷暑
冗中不能一一

卷面并三代脚色務要如式親書為上若倩人慣熟者
寫之亦可須要一字一字對校點畫偏傍所繫甚重也
每場各宜安放臨時仔細看詳須縫一洗舊青布袋僅
取容卷從頸中懸掛胸前防衆中不測袋須舊青布者
恐靛色易汙卷面也入場我有舊青三梭直身是曾入
會試場者汝可與母親檢尋來服之且留與同孫作傳
衣也褲子亦須要綴襟頸帶今年八月近寒須防風信
場中過煖不妨耳要帶好水梨蜜薑用筆須試過稱手

者乃濟事多亦無益也燈燭下謄真尤要仔細須再三
看題目次序恐坐失格是一番徒勞耳初場七篇文字
破題要整齊溜亮講股要分明切理繳束處要出新意
以見精神切忌短弱作結老健有波瀾通忌晦澁中場
作論於時文中作古文間架要雄深雅健最忌熟爛與
套子說理文字要鋪敘義理明潤成章與作史論立議
論不同格表只要鉅釘圓熟須看時代若唐表只看韓
柳等作宋表要典則雅麗俱須照管題目用意措詞五

判畧知律意便可用事填去以通暢為上五策先要識
策眼如君德便須與相業相並之類只在策問中已含
此意了認得了大頭腦便縱橫說去其體方雙關文字
多便好看要事實至囑至囑

陳秀至始知有臨場再試之舉但慮吾兒氣體不耐許
多勞苦老懷懸懸大凡世故亦要練習今是冠年矣但
不可隨世毀譽孳孳於得失之間以動其中耳故令陸
欽由江行來看汝欲知入場的信若不得入場便須東

歸積學待時未晚也提學處因在嫌疑之際不可致書
若科場蹉跎得進學亦可但不可干人薦引吾兒自當
以遠大自期立志以明道希文為的在吾兒勉之而已
吾鄉水土薄風俗日下須奮發激昂自拔秋來懷抱不
甚佳候吾兒信為慰八月朔

時文新變得險怪今科欲一洗之此人心之公亦天理
亦世道關繫不小江西程文吾與有力焉近已見兩京
浙江湖廣皆有復古之意可為文運慶北京錄公謹寄

來湖廣錄多出於崔東洲之手吾兒宜觀之吾鄉大運甚厄奈諸君不聽好說何戒戒

每見吾兒論吾升沈事詞意輒不平此雖父子之情却甚不可吾老矣出處進退有義有命各求得其本心而已自後見人問及但曰家父亦安之如此即了苟委曲之不惟於吾無益亦非養汝和平之福也至囑至囑所要江西文卷無甚愜意者要不足為吾兒法耳寄去數篇即此中巨擘其不記出處者是考卷知之提學先生

許抄錄數篇來忙甚未到手俟別寄葉掌教先生兩
子已到省方與謀但渠根脚是上次考罰等第殊難下
手未有以報也

我八月初七日署掌司事要脫進場之勞至十五日科
場事務又脫不得却辭了司事連夜幹辦似過勞廿八
日鹿鳴宴罷更初痰氣發作甚苦甚苦是夜右臂如割
亦是作團兒疼明日過南昌道中偃卧小睡後加倍痛
楚至無安身處喚醫診視云是痰火且小作運動方甦

自後每至三更後即痛痛即起坐掉臂日間穿衣作揖
與把筆書判却似少解以此知宜動不宜靜也如此二
十餘日今可矣汝母之症恐亦是如此今且令人扶掖
在房中走幾步或坐眠椅不可倒身貼席試之如何此
病只是血虛多勞多思所致可延明醫仔細診視請山
立早晚照顧嘗見人醫血虛多作風氣濕氣後成大患
蓋血虛乃是不足風濕猶是有餘二症用藥不同可請
問顧五叔斟酌之吾兒前書勸我求退我有何貪戀耶

顧國恩未報恐兒輩坐享難消耳先欲效勞徐俟機會也

八月廿六日主簿劉永濂自嚴太宰處附至汝書并頭場題目知汝勞苦吾意甚憐之九月十六日驛夫持書錄至再知汝二三場勞倦吾恨不能止汝此行奈何奈何想今已到家不至作病否要靜定養心為主至囑至囑吾十四日已見南畿試錄解元乃是儒士彌封拆號豈有意必耶汝告入學又添一番擾攘恐汝因此奪却

工夫汝宜自勉汝學未成未可有過望但人生出處各
自有時古人云強學待問可也發周秀回為他一年在
外此子似稍本分有送府縣書錄一一付與吾兒裁處
分送之我起居事務可一一問他汝母病勢緩急可與
盤纏打發阜隸陳秀星夜先來後令桂魁一來亦得

念吾兒獨學於家海濱新縣殊少麗澤之益欲告吾兒
者非筆墨能盡賴兒知向上不昧於是非頗足慰老懷
耳今歲科場吾計兒曾作過幾篇恐是好尚時新體製

為黜落爾且經學尚未經師講明金華姜郎中綱字幼章丁丑科程丈甚佳今罷官歸家甚貧吾向自北歸與之同行且致意欲延至吾邑令汝從之此可與儲芋西老先生商量吾家西園中請來與吾兒一講館穀束脩不難也議定可報來吾從江西致書大凡講學須明經明經以經世為大吾兒此行游諸老間亦有所觀法乎讀書之暇亦須處置家事別辨男女灑掃室堂羞潔祭祀應接賓客鈐束婢僕問理園田之類畧畧經心但不

可為利耳吾少時讀書亦只是隨世俗以圖榮華溫飽
故不能大有為於天下吾兒勉之舟次龍津驛

四川家書七首

六十生朝杜門謝客惟有思親懷鄉東望悵快而已想
汝母親并汝姊諸骨肉不知何以為情耶吾留滯在此
不意作許久前時五月間信是虛傳昨推北太僕點陪
者此兩闕北行西留皆非吾願若得南闕甚好亦且聽
命而已此間事亦有難處者早晚殊勞苦幸此身康強

勝似在家聊以自喜耳家事遠吾不能計慮吾兒量能
照管但凡事務減省併工學業科場近吾老矣汝母病
近醫藥如何此心懸懸言不能盡偶有人便附此不知
何時可到也此月中欲打發山立同一人回且稍待未
定未定餘不及一一書族中至親并顧五官人學召輩
只報與康寧而已

自舊歲十二月十四日張忠來得家信汝雖不報同孫
吾慟苦奈何此兒終坐闕乳之故此為父母者之過往

者不可追後車之轍可以為戒切記切記正月七日唐
信臣報汝母病愈頗得喜慰但老年淹纏恐元氣不能
復大憂大憂六十壽誕不知汝輩如何為禮吾惟有拈
香拜禱而已送歷承差近兩三日自南都來傳國相
計當在新正得到想家中必有人同來甚慰望慰望顧
提學先生進表行云欲至吾松寄家小乘便附書未卜
何日可得到真所謂家書抵萬金也此間一行人伴俱
好但東歸無期耳可再四慰安汝母親官中事不甚費

力覺精力勝在江西時比在家大不同汝輩亦可安心
眼疾漸瘥眼力漸減汝可視吾手筆家中凡百想汝能
料理聞汝已食糧亦家門之光不可廢却工業至囑至
囑餘俟良便

寄回逆臣錄一部彰善癉惡錄一部可看其大綱科場
中首一問策要問此兩書也知之知之歷可照舊年分
送其餘酌量吾兒與學召商量處之或寫我名亦可

前廿四日顧提學僉憲行曾附家書但不知何日得到

也今因楊同府行再附此紙楊如上任可與顧五叔同
去隨分行賀此間人口俱安刻日望傳國相承差到耳
張忠或再至上海也汝母親得安好汝可上緊學業更
須於應事接物上體驗天理人欲之分孔子曰克己復
禮為仁此是終身受用大學問目前小小毀譽不必留
意也老身遠在萬里家事勢不能及汝可向上向學至
囑至囑餘可寄聲內外親戚東歸想不久也

三月間書寄顧提學楊同知不識何日可到我此間百

凡只如常眼疾似輕終是力短耳六十老人亦是常事
五月十二日承差自京還潘巡撫先生陞督木侍郎朝
議欲以我代之但命未下若果有此東歸未知何日兼
是此間地方亦有兵荒難處之事奈何奈何我中心只
愁汝母親病圖歸一見汝侍奉盡心盡力得好些便半
眠半起老景儘不妨但不可令管家事爾家事且只令
各家人照舊掌管要戒飭此輩安分營生毋蹈前轍汝
一心只向學轉眼明年又是科場矣我只看汝此一着

至囑至囑學召前次不寫書想不在家汝姐如何可傳
我意要伏侍母親也顧五叔并族中不得一一作書可
道意今後承差來順差可與銀五錢特差一兩知之

朱兵備富太守書近日方到知汝母親病日就痊可甚
喜甚喜但年已衰老終不能無憂也奈何奈何吾在此
思家之心不能奮飛但萬里去就殊為難耳自入冬來
吾情況不甚佳兼政務冗碎須一一理會費心力不可
言要取一房有家小得力家人來用緣置二三婢子皆

不甚得力要伴送乘春水出峽回來吾遂作歸計也至望至望家事吾不及問想吾兒自能隨宜料理之只望汝來秋科場一舉吾一生事決矣汝姊夫婦并汝房中嗣息吾尤以為望也陞遷消息已靜聽之命但得脫此地方自作計較明年六十一歲吾豈久戀榮名者知之知之寒甚忙甚寫此不盡臘月十二日

二月十八日抵荊州已脫三峽之險是日遂得李譚二吏齎汝家書至得汝母痊好信息慰喜不可言蒙恩得

轉入京實出望外但衰病日益甚無以報國為之憂懼
憂懼廿四日即取道襄陽南陽入朝矣此官列居禁近
聖明嚴核故不作東還恐遲負耳新詔亦有三代恩典
亦欲乘此機會汝母子自可安心不必懸掛兼我舊病
最忌濕熱以故北行欲趁四月初旬到任殊為匆促汝
今歲亦有科舉恐又涉一番人事有妨費也汝知之知
之今打發陸欽回秋冬衣物可即遣的當人同送從閘
河至京一一細事俱分付陸欽汝可與母親從宜處分

欽亦不可重託知之知之坐船窓燃燈附信可意會也

儼山集卷九十六

欽定四庫全書

儼山集卷九十七

明 陸深 撰

書

京中家書二十二首

自黃甥家人來得吾兒六月間書知為考試留松至今
尚未知院試吾兒名在幾也末世浮競滋偽不足介意
次第程子看詳學制罷去月書季考以息爭此是大賢

經世深意可思之思之宋朝惟呂申公韓忠獻家世可
法吾意欲兒隨衆就試以養氣體省奔波不知誰同相
處姚子明想共事否餘可擇交語云汎愛衆而親仁吾
兒以謙厚存心最好鄉人來俱稱道此雖不足恃詩云
庶幾夙夜以永終譽可用以進德也至囑至囑今打發
桂魁周秀二人徑往南都恨不及汝入場左右之吾老
衰日甚望汝不淺待此翻消息吾亦當結局矣為汝母
病耳非言可盡非言可盡努力努力恩典得及三代吏

部再題上即出謝矣許仲貽有書知之八月三日

山立侍我三年往來水陸二三萬里小心謹慎早晚醫藥效勞過於骨肉吾兒知之今遣與唐中舍同行陸仁伴送還此間薄有所助亦不能加厚吾兒可經紀其家使不失所至囑至囑唐世全待我敬愛倍常見時可致謝併謝龍江翁也差去桂魁周秀計廿一二日可抵南都吾兒試事惟當盡人以聽於天但吾兒早有令名思所以保之此書到日事當已定吾此間得信早有分

曉別有書去也汝母聞病漸好老年人不可恃第一不
令管家事閒靜中又防有悶鬱處可思所以承順之家
事大小吾兒須要周詳慎密最是門戶要緊要緊各家
人俱要守本等餘事可問山立仔細八月十八日

晚來始得南京鄉試抄白名字吾邑竟無一人上錄豈
氣運所關耶吾兒且可因此積學未遲也目今可一意
奉汝母親以安我南顧之心此間官事亦有轉動機括
但我在仕路三十餘年未嘗有一希冀幸成俟命而已

知之知之家事我悉付汝自宜勤慎謙和但家下倚靠
生事之人不可不嚴以待之事露即送官府重治我家
前車可鑒毋得再令小人藉手以為功名也至囑至囑
門戶早晚切宜著緊關閉房屋上緊補完其間區處吾
兒自主張為之我亦不與也奉母之暇自宜治心養氣
讀書窮理以希古人汝得名太早吾私憂之學召夫婦
欲要北來當別有書九月十九日

人來傳汝三叔行事過當吾不敢信至親人到方問得

的確但只是為利耳初無大失只是吾老矣恐招尤取侮為家門之玷吾作書勸之所謂垂涕泣而道者吾兒早晚當愈加謹慎積誠意感動之亦可說破此意也如今朝廷甚明我輩文官家不好如張孚敬閣老家事危不可測知之知之不能盡不能盡

昨寫一紙寄與蘇州陸鳴鴻恐到遲今附唐子登監生知汝下第還康健為慰自古得失窮通俱有定數如今歲又不測乃爾凡百只有安命極有受用須要進學不

可疑阻吾處此頗安穩前月衙門有火災甚異賴聖明
幸免罪過又恐流言驚汝輩也知之知之汝母入冬來
何如前附芡實方可常常煮服想有益而無損也慶龍
并新甥要節慎風食家事種種吾悉付汝隨宜料理仁
義為上不必更求增益以奪汝向學之心此三年正好
用工以遠大自期待要與古人為侶後此汝父母老矣
惜陰為囑為囑族中諸骨肉并世安至親等俱一一致
意榛姪近有書物至可謝之長子不幸殊可惜也長安

東軒十一月七日

顧子龍上舍來為乃祖東江公乞謚得文僖葬祭恩典
皆蒙聖賚甚厚亦孝子慈孫也南歸附此今年畿省試
錄陸續寄回雲南方到已完矣吾兒想曾著眼吾以廣
西雲南為優以其有規矩也語云三人行必有我師焉
不可漫過如有疑可劄出寄來以考所見如何向見包
中書自南來傳馮提學先生盛有稱許且感舟楫大江
之夢近陸槩舉人至所說亦同果然吾兒當勤惕向上

以求無負知己也家事只宜敬慎收束吾兒將此事操練熟以為他日致用之地亦無不可但不可學驕奢侈靡耳冬盡著一二人回探望汝母只要左右奉養醫藥調理為上此間懸望差一的當人到餘不一十二月二日

寄來墨卷觀之辭理不失格式俱是但氣未貫耳將抄出細批還得失有命不足計校正須更下三年縝密工夫也用以呈石門老先生極口稱美有批語東帖併還

思以報知己也至囑至囑新解元卷亦自有好處惜空
疎爾未易輕視之臘月廿四日燈下

正蒙一書難讀吾嘗欲箋注數語不敢輕下筆橫渠先
生認氣為道與吾意見不合今得此書寄吾兒讀之有
所得處可寫出寄來日常讀書工夫不可間斷却要理
致分明行事須義利路頭辨別耳盛名之下難副吾兒
自須喫緊

龍江今堂老夫人訃音雖無的報吾亦不曾奉慰汝可

行弔禮為我具祭作文一軸郁直齋儲芋西皆可隨宜
沈西津俟其發引吾有修玉牒事且兼學士聖上恩威
俱不可測南除南歸事且不敢言及吾兒為我久長作
區處可也汝母有一日者云過今年尚當强健且看秋
冬間姑以北來并出玩山水勸之汝可料量以慰其心
須時時報的實信來族中親戚俱可慰達下第諸人歸
可訪勞之朱子明孫汝益有書禮至別當奉酬可先謝
之日下大忙不能一一

今年江南文運似厄郡中才兩人劉德資復下第頗可
念顧道夫姿性聰慧過人且相聚講學用工以待時未
晚也吾昨於初三日謝新命恩始終十年不欠一日復
上玉堂豈有數耶玉牒纂修須待書成意作南歸恐不
得如願奈何奈何劉奉今日到傳說汝母病愈但不見
汝手書爾意甚懸懸汝可盡心侍養冊立事尚未有期
且候的信作行計也扈駕沙河失朝候罰俸三月知之
知之翰林院到任擇在初十左右事畢令姚雯回報恐

此信在後到百凡事可敬慎世道日下吾兒務以寬厚
仁惠為本餘別有信報知不一一

今科會試錄出於未齋甬川二老先生之手方復得成
化弘治之舊只照此說理修詞自可合格矣不必務為
浮詞漫語以取主司之厭薄也作舉業須體貼經傳為
主只看蒙引與虛齋所選程文亦可

我自十五日入閣下讀殿試進士卷今早五更入華蓋
殿拆卷還姚雲尚未行復寫此報今科名第皆朝廷親

定校閱試卷甚精且當真不世出之英主也初內閣擬
蘇州陸師道作狀頭其卷甚佳御筆批作二甲第五取
袁煒第一文華宣讀已出復召二老兼未齋入改為第
三親擢茅瓚作狀元吾松二人皆居前列莫如忠初亦
擬在一甲之列董子儀文字亦好但有繆誤處須得與
吉士選也試錄名字一本凡讀卷官俱有今寄回可藏
之

近黃甥標至具知家事委曲三月七日高石灰人至書

亦到殊念汝子母中夜為之泣歎吾既留滯於此且有
職事付託此出聖主淵衷未敢作辭謝計也奈何奈何
吾兒敬謹勤慎鄉人來輒有美譽吾晚景頗以為慰須
向百尺竿頭進步也古人云愛身明道修已俟時此喫
緊第一法也眼前不如意事亦須區處要令胷次灑然
不可傷氣尤宜勸母親減煩惱省閒事至囑至囑吾兒
少便得名却須忍耐忍之一字衆妙之門吾老來亦只
學忍也知之知之五月廿六日

孔子有言不如鄉人之善者好之其不善者惡之吾兒所具鄙吝矯激之言但安受之不妨吾一生在毀譽中老覺得力若做鄉原濟甚事不足與校也側身修行却不可放過

寄至古文二篇不妨酬應已為批抹塗改可細玩味之自汝學為文吾皆在奔波之日無暇指授法度前日寄來三場卷亦已令人錄出亦要細批不曾得工夫辦得文章是儒者末事亦須充養始得吾家有老泉批點孟

子可讀其次多讀漢書韓文左傳却被近時學壞了成一套子矣

朝廷每有大事必令與議但乏書考校此間亦復置買數部兼抄得奇書亦有數種四川板禮記纂言便寄一部來家內藏書可曬晾收束再做數廚櫃亦不難此傳子孫至寶也可倩山立輩併桂魁等識字人逐一清楚作一書目寄來殘闕查卷數明注其下只作經史子集分類標出宋元板并近刻分作三四等有重本者亦注

出此間可損益也畫卷字冊亦須架閣古人重收藏也
歐陽文公圭齋云士大夫寓形天地可託者二一曰有
丈二曰有後二者未必得兼吾蚤年成名科第皆占高
選今官為學士薄有文名筆札著述流傳海內未必一
一合作古人於今人亦不為少若吾兒向上不墜家聲
無憾矣六月十日自東閣議禮還書

昨日有書與高石灰張九錫今日行再附此此人在京
吾待之頗盡委曲到家可隨衆行賀禮今歲京師濕熱

如江南梅雨尤異故自五月初腰痛牙疼殊不快近日
已甦但覺人事勞攘日用廣費耳吾亦懸念汝子母顧
瞻桑梓如在天上奈何奈何此間人伴緊用鈐束陸方
夫婦却用心不至如人言也吾兒治家聞有條理時世
如此更宜收斂家人輩治生斷不許放債若曹濟陸鑑
量與資本或以租米換布來此亦可緣我要知家事爾
酌量酌量飯米可隨便附搭蘇物蜜果之類要用六月

十三日

得汝所撰筠松府君行實文字亦可觀但欠世次事蹟
詳贍遂留俟吾兒到京商量要求得神道碑文字須慎
之今且先啓神主櫨抄寫生卒年月并查考葬期尤夫
人同寄來汝祖妣墓誌石尚未埋俱留浦東南宅上所
以久俟者正為今日爾可查出墨打四五幅寄來或先
抄白亦可勅命亦要謄黃來二代共四通此要作新誥
命按據墳山工作秋間可再加修理粉飾之吾兒便可
承當靠人不得此等子孫祖宗有靈亦不廢祐牌樓題


扁吾只欲書一官蓋大事惟簡重若事誇耀便小家相
汝三思之

即日世安四弟俱已入城骨肉團圓於久別之餘亦是
旅中一樂但汝母子懸隔安否在念却又添一倍情緒
也吾此間人伴粗安亦無他難事只今年濕氣過於南
方著意調理醫藥不離頗覺衰年酬應費力爾亦以節
省為事使用人事須用家資幫貼可於房錢內寄得三
百兩來應手却俸資可積整銀如此計較亦要兩便耳

知之知之家中諸事四弟輩亦未曾細話吾兒能善處自有天理切不可傷氣致疾至囑至囑古人云忍過心清涼不必與俗人校短長也吾賴朝廷祖宗清銜美秩已為過分吾兒能做好人富貴何足道也六月廿二日此集劉德夫先生為庶吉士時館閣中試題月課先生丙辰科予為庶吉士時嘗得其抄本讀之甚加敬慕其製作和易典雅無後來險怪之氣吾兒觀之如何如何廿二日對雨書

昨廿二日有書附奚黃門乃弟今相姪行甚促再附此
相來吾兒備道曾醫汝母有勞有力相亦滿口稱吾兒
行誼吾甚待之厚但其所謀所望者皆非吾力量可為
兼於事體甚礙甚不得意而還觀其詞色似忿忿然吾
兒可善待之善待之世道下移人心叵測宜加意加意
汝母前可稟知顧東川并四弟俱到別居早晚相見事
尚未處也此間有一處相應房子講價千金若決成須
家中取銀六七百兩來此房要作久計也意要請汝母

來再有處置定當報之吾兒可調理身子存心養性為
第一義家事預宜收束著落吾不從中制也六月廿四
日



儼山集卷九十七